

L'admissiun al stgalim superiur da la scola populara dal chantun Grischun

Admissiuns entaifer il stgalim superiur

Chars geniturs¹

Cun questa infurmaziun orientain nus Vus davart la procedura per

- l'admissiun da la scola primara a la scola reala u secundara (pagina 2)
- l'admissiun da la scola reala a la scola secundara (pagina 2)
- l'admissiun da la scola secundara a la scola reala (pagina 3).

Remartgas generalas:

1) Finamira da la procedura:

Voss uffant duai - sche pussaivel senza examen - vegnir assegnà correspondentamain a sia qualificaziun a la scola reala u a la scola secundara.

2) Decisivs per la decisiun d'admissiun èn:

- las prestaziuns en scola
- il cumportament d'emprender
- il cumportament da lavurar
- il cumportament social.

3) Observai ultra da quai:

Per ils scolars da la 1. classa da scola reala u secundara po vegnir concludida, en il cas d'ina evidenta assegnaziun fallada, durant il 1. semester, cun il consentiment dals geniturs, l'admissiun ad in auter tip da scola.

4) Las personas d'instrucziun èn gugent prontas da discurrer cun Vus davart Voss uffant e davart sia situaziun da scola. Sche Vus vulais, pudais Vus As volver da tut temps a la magistra u al magister da Voss uffant.

¹ Qua ed en quai che suonda è manegià cun "geniturs" la represchentanza legala da l'uffant; medemamain stat "scolar" per scolara u scolar.

Voss uffant è en la 5. u 6. classa da la scola primara

5. classa:

- A l'entschatta da l'onn da scola orientescha la persuna d'instrucziun Vus davart la procedura d'admissiun.
- En il decurs da quest u dal proxim onn da scola preschantan las persunas d'instrucziun da la scola reala e secundara lur tips da scola.
- Durant il segund semester analysescha la persuna d'instrucziun cun Vus en in discours individual il svilup da l'uffant e las finamiras pussaivlas.

6. classa:

- Vers la fin dal 1. semester fa la persuna d'instrucziun puspè in discours individual cun Vus. Silsuenter As communitgescha ella en scrit la decisiun *probabla* d'assegnaziun.

Voss uffant è en la 1. classa da la scola reala

- Durant l'emprim quartal orientescha la persuna d'instrucziun Vus davart la procedura d'admissiun en la scola secundara. Sche Vus prendais en consideraziun questa midada per Voss uffant, alura annunziat quai a la persuna d'instrucziun fin ils 30 da november **en scrit**.
- Sche Vus avais annunzià Voss uffant per la procedura d'admissiun, alura orientescha la persuna d'instrucziun Vus vers la fin dal 1. semester en in discours individual davart la decisiun probabla d'assegnaziun. Quai succeda er, sche Voss uffant n'è betg annunzià, duess dentant vegnir admess en scola secundara tenor l'opiniun da la persuna d'instrucziun.
Fin 3 emnas avant l'assegnaziun pudais Vus pretender da la persuna d'instrucziun che la decisiun definitiva d'assegnaziun vegnia communitgada en scrit.

- 6 - 10 emnas avant la fin da la scola As communitgescha la persuna d'instrucziun la decisiun *definitiva* d'assegnaziun en scrit.

Sche Vus na faschais nagut, alura vala la decisiun definitiva d'assegnaziun per il proxim onn da scola.

Sche Vus na giais betg d'accord cun la decisiun definitiva d'assegnaziun, alura pudais Vus annunziar Voss uffant aifer 10 dis tar l'inspectur da scola competent per far il *giudicament d'admissiun sin recurs*. Quest giudicament absolva Voss uffant ca. 3 emnas pli tard.

Il giudicament d'admissiun sin recurs vegn organisà d'ina cumissiun regionala d'assegnaziun e cumpiglia:

- in discours da giudicament
- mintgamai in examen en scrit ed a bucca en matematica e lingua materna (per scolars da scolas rumantschas e per scolars da scolas realas talianas er en tudestg).

Il resultat vegn communitgà en scrit. El po vegnir contestà aifer 10 dis tar l'inspectur da scola competent.

Cunter la decisiun da quel pudais Vus appellar aifer 10 dis dapi la comunicaziun en scrit tar il departament d'educaziun, cultura e protecziun da l'ambient.

Voss uffant è en la 1. classa da scola secundara

- A l'entschatta da l'onn da scola vegnis Vus infurmads tras ils magisters secundars davart la permeabladad aifer il stgalim superiur.
- En cas da basegn, particularmain sche la promoziun è periclitada, vegnis Vus orientads tras las personas d'instrucziun davart la situaziun da scola da Voss uffant.
- Sche la promoziun è periclitada, alura As vegn communitgà quai en scrit 12 emnas avant la fin da la scola.
- En cas da nunpromoziun vegn Voss uffant assegnà, suenter avair dumandà Voss avis, ubain a la 1. classa secundara (repetiziun) ubain a la 2. classa reala. Questa decisiun As vegn communitgada en scrit 20 dis avant la fin da la scola. Cunter questa decisiun pudais Vus contestar aifer 10 dis tar l'inspectur da scola cumpetent. La decisiun da quel vegn communitgada en scrit e po vegnir appellada aifer 10 dis tar il departament d'educaziun, cultura e protecziun da l'ambient dal Grischun.

L'entrada al gimnasi

L'admissiun al gimnasi succeda en il cas normal

- suenter la 6. classa primara (entrada a la 1. classa gimnasiala) u
- suenter la 2. classa secundara (entrada a la 3. classa gimnasiala).

L'entrada al gimnasi premetta en scadin cas la reussida d'in examen d'admissiun.

Infurmaziuns pli detagliadas obtegnis Vus tar la persuna d'instrucziun da Voss uffant u directamain tar las scolas medias.

Infurmaziuns actualas davart quest ed ulteriurs temas obtegnis Vus sin nossa homepage: www.avs-gr.ch